

Museo Antigüedad Aruba, otro Museo cu balor inmenso pa nos isla

Lastima cu no ta ubica na un lugar ideal pa ricibi bishita diariamente



ORANJESTAD - Fundacion Juan Mario Odor (F.J.M.O.) tin e trabou inmenso di proteha y informa ariba dos Museo importante di Aruba. Un ta Museo Numismatico y e otro ta Museo Antigüedad. Tur dos ta Herencia Nacional cu señor Juan Mario Odor a laga atras pa Aruba. Mario tabata conoci den comunidad pa diferente aspecto; pa un Numismatico serio, e prome arkeologo amateur di Aruba, como tambe un coleccionista grandi di antigüedad y ta tambe e co-fundado di Museo Historico. Su pasion pa e Isla aki tabata incondicional y incansabel pasobra e no tabata pidi ni spera nada a cambio,

ni sikiera reconocimiento. Pa hopi hende e ta un persona desconoci. Pero pa otronan cu tabata tin e placer di a conoce, e tabata un persona hopi special.

BREVE BIOGRAFIA DI JUAN MARIO ODOR

Awe nos kier dedica tempo pa relata ariba un aspecto di su bida. E amor cu e tabata tin pa su Isla a pone cu e no por a soporta e mentalidad di "throw away" cu a desaroya ariba e Isla den añanan sesenta pa setenta. Tur hende a cuminsa benta cos bieu afo pa pone cos nobo y moderno. Esaki a pone cu el a cuminsa ta cumpra y busca tur cos di

nos bieunan pa e wardanan. El a haci esaki atrobe cu tur apoyo di su señora Ines y su yiunan.

E tabata cana den mondi pa busca rond di ruinas di cas of bishita famianan cu ya no tin utilidad pa artefactonan di nan antepasado. El a cuminsa cu e hobby aki den añanan setenta. E ta e prome persona cu a organisa un exposicion di artefactonan bieu den Instituto di Cultura den añanan 80, cual porcierto a resulta den un bunita Museo Historico cu nos conoce awendia. Riba su mes Mario a sigui semper cu interes pa warda cosnan di antes di Aruba y pesey awendia e Museo Antigüedad ta bou responsabilidad di famia Odor cu ainda ta buscando tur artefactonan bieu cu a ser usa ariba e Isla. Su viuda, señora Ines, ta un persona conoci awendia pasobra tur cos di antes ta bon bini serca dje y te ainda regularmente e ta haña cosnan interesante y historico pa e Museo. Museo Antigüedad tin den su poder entre otro e prome telefon di WEB cual ta algo masha interesante.

MUSEO

E museo aki tambe lo cai bou maneho di sra. Desiree Croes cu ta dirigiendo Museo Numismatico Aruba cu exito, pero como cu no tin un lugar adecua e ta keda den scuridad.

F.M.J.O. ta spera cu den futuro un maneho pa Museo adecua lo bin ariba mesa pa asina henter Aruba por sinti nan mes orguyoso di e Museo aki y cu lo e tambe por ta den centro di ciudad ricibiendo e atencion cu e merece.

Tambe sra. Croes ta spera cu Sr. Juan Mario Odor, aunke cu ta despues cu el a fayece, un dia haña un nomber di caya na su nomber ariba e pida baranca su el a stima asina tanto. Apelacion ariba esaki a ser haci dos aña pasa pa F.J.M.O.

Museo Antigüedad lo habri pa publico pa celebra dia Internacional di Museo ariba 22 di mei, diadomingo. Lo bo por disfruta un dia ameno cu bo famia den ambiente di caha di orgel. Mas informacion lo ser duna despues. Si bo persona tin artefactonan cual no tin uso mas por fabor yama na telefon: 583-2039 y nos lo tin un lugar special pa nan.

